

IN MEMORIJAM

PROF. DR. SC. IBRAHIM BUŠATLIJA - BUŠ
(1930. - 2019.)



Preselio je na Ahiret doajen geografske nauke u Bosni i Hercegovini **prof. dr. Ibrahim Bušatlija**, univerzitetski profesor, član: Udruženja geografa u Bosni i Hercegovini, Speleološkog društva Bosne i Hercegovine, Pomorskog društva Bosne i Hercegovine, Bošnjačkih intelektualaca, Vijeća kongresa bošnjačkih intelektualaca, Bošnjačko-bosanskog patriotskog fronta i dr. nevladinih udruženja. Bio je patriota, partizan, učitelj, nastavnik, asistent, univerzitetski profesor i do smrti živa geografska enciklopedija.

Profesor Bušatlija rođen je 08.03.1930. god. u Vitini pored Ljubuškog u čuvenoj begovskoj porodici. U rodnom mjestu završio je osnovnu školu, a Nižu gimnaziju ranga Učiteljske škole u Mostaru, nakon koje školske 1947/48. god. je bio raspoređen na učiteljovanje i upravljanje Osnovnom školom u Svinjarini, općina Mostar. Višu pedagošku školu grupa geografija-historija završio je šk. 1950/51. god, nakon koje je službovao kao nastavnik geografije i historije u Čitluku, Kalinoviku i Sarajevu. Diplomirao je geografiju na Filozofskom fakultetu Univerziteta u Sarajevu 1957. god. od kada radi u Drugoj gimnaziji u svojstvu profesora geografije.

U zvanje asistenta na Odsjeku za geografiju Filozofskog fakulteta izabran je šk. 1957/58. god., a od šk.1960/61. radio je kao predavač geomorfologije na Odsjeku za geografiju Filozofskog fakulteta Univerziteta u Sarajevu. Doktorirao 1965. god. na Odsjeku za geografiju Prirodno-matematičkog Fakulteta Univerziteta u Sarajevu, uspješnom odbranom doktorske disertacije: „Reljef u površinskom slivu Nevesinjskog polja“ i iste ak. godine bio je izabran u nastavno-naučno zvanje docenta za predmet Geomorfologija na Odsjeku za geografiju Prirodno-matematičkog fakulteta Univerziteta u Sarajevu.

Tokom radnog vijeka imao je više studijskih boravaka i specijalizacija od kojih je posebno značajna specijalizacija iz Geomorfološkog kartiranja šk. 1966/67. na Univerzitetu Lomonosov u Moskvi.

Veoma rano, kao pionir, zvanično od 1943. god. pomagao je u Narodnooslobodilačkoj borbi protiv fašizma, a nakon Drugog svjetskog rata učestvovao je na omladinskim radnim akcijama na obnavljanju domovine.

Tokom radnog angažmana bio je Urednik naučnog časopisa „Geografski pregled“ u izdanju Geografskog društva Bosne i Hercegovine. U novije vrijeme, od 2014. god. do ovoga broja bio je u Uredničkom odboru naučnog časopisa „Acta geographica Bosniae et Herzegovinae“.

Na Odsjeku za geografiju Prirodno-matematičkog fakulteta Univerziteta u Sarajevu pored oblasti na koje je izabran predavao je i niz drugih geografskih oblasti i predmeta kako na matičnom Fakultetu, tako još i na istim ili srodnim, u Tuzli, Mostaru i Sarajevu.

Tokom agresije na Bosnu i Hercegovinu sve više se bavio geografskim temama iz oblasti geopolite, političke geografije, historijskog i geografskog razvoja Bosne i Hercegovine i njenih granica kao i dr. geografskim aktuelnim temama.

Ostali su brojni naučni radovi, rasprave, diskusije i knjige sa imenom rahmetli profesora Ibrahima Bušatlije. To je ozbiljno geografsko štivo originalnog metodološkog i metodičkog pristupa koje će sadašnje i buduće generacije geografa pomno analizirati i proučavati. Buš je profesor sa veoma brojnim originalnim idejama koje nije čuvao za sebe već ih nudio drugima, posebno mladima podstičući ih na naučna istraživanja.

Posjedovao je veliko znanje u okvirima ne samo Fizičke već, podjednako, Društvene i Regionalne geografije. Bogato pedagoško iskustvo još od učiteljskih dana veoma je vješto koristio u transferu geografskih znanja pa ga njegovi studenti pamte po nezaboravnim predavanju iz Metodike nastave geografije.

Pred kraj života zalagao se za "povratak" uzurpiranog geografskog teritorija Sutorine Bosni i Hercegovini, iznoseći činjenice u koautorskom naučnom radu „Sutorina – uzurpirani geografski teritorij Bosne i Hercegovine“ u Posebnom izdanju ovoga Časopisa 2015. god. Problematizirao je pitanje „Otvorenog mora“ Bosne i Hercegovine i neriješene njene pomorske granice, čije su misli sakupljene u djelu Neum i bosansko

primorje. Veoma često je isticao da je "Republika Hrvatska proglasila državni suverenitet na pomorskom području Bosne i Hercegovine" i da je hrvatska "ilegalna ratna odluka od 2. februara 1994. anektirala morski teritorij Bosne i Hercegovine i onemogućen njen slobodan pristup otvorenom moru, a koji dozvoljava „Konvenciji Ujedinjenih nacija o pravu mora“.

Buš je bio jedan. Bio je originalan, vrlo svestran, metodičan, razgovjetan, predavački zanimljiv, pedagog, metodičar, metodolog, geografski terenac; jednom riječju neponovljiv – kompletan geograf.

Mi starije generacije iz Udruženja geografa u Bosni i Hercegovini smo ponosni što sam bili njegovi studenti, a neki najbliži saradnici – asistenti i mlađe kolege. Isto tako veoma često i rado ističemo da smo imali čast i privilegiju da nam profesor Bušatlija bude mentor u geografskoj orijentaciji za budući naš pedagoški i naučni poziv.

Za zapažen rad u Udruženjima bio je više puta odlikovan. Mi iz Udruženja geografa u Bosni i Hercegovini posebno smo ponosni što je u našim analima zapisano ime profesora Bušatliju kao nosioca najvišeg priznanja – Spomen plakete. Za plodan rad u uvođenju mladih u nauku u okviru Pokreta „Nauku mladima“ od Narodne tehnike Bosne i Hercegovine odlikovan je Srebrenom plaketom, a od Univerzitetu u Sarajevu odlikovan je Plaketom.

Neka je našem profesoru Bušatliji Rahmet i lahka Zemlja bosanska. Neka ga Allah za dobra djela, koja je nesebično stvarao i dijelio, nagradi lijepim Dženetom.

Uredništvo